

Date – 30/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Aizawl Municipal Corporation ward 19 inthlannaa chuh tuma hming pe lut candidate 68 zingah inhnukdawk an awm lo.
2. Thlaleh April ni 21-a Aizawl Municipal Corporation inthlan lo awm tur atan Political Party hrang hrangte'n vote zawn an ngawrh chho hle .
3. MSU hruaitute chuan sawrkar hnathawk aikal la mi 14 an awm thu Education Minister Dr. Vanlalhlana hnenah an thlen .
4. Lok Sabha chuan vawiin khan The insolvency and bankruptcy Code (Amendment) bill,2025 chu a pass.

<><><>

AMC SCRUTINY

Vawiin hi Aizawl Municipal Corporation ward 19 inthlannaa chuh tumte tan inhnuhdawnha ni hnunung a ni a, he inthlan chuh tuma hming pe lut candidate 68 zingah inhnukdawk an awm lo.

State Election Commission chuan AMC inthlan vote thlak ni atan April ni 21 a ruat a, vote tla te hi April ni 27-ah chhiar a ni ang. Kar kalta Zirtawpni khan AMC inthlana chuh tura hming pe lut mi 68-te nomination endik a ni a. Candidate 68-te chuan endikna an paltlang vek a. Inhnuhdawn theih hun hnunung vawiin tlai dar 3 thleng khan candidate zingah inhnukdawk an awm lo a ni.

AMC inthlan lo awm turah hian rorel lai ZPM, bakah MNF leh MPCC te chuan bial 19 an chuh kim vek dawn a. BJP chuan bial 11-ah candidate an nei a. Independent candidate an awm lova ni. AMC bial 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a, tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

AMC inthlan lo awm turah hian vote nei mi nuai 2, sing 3, sang 7 leh 846 an awm a. Polling station 257 awmin a tul anga auxiliary polling station siam belh a ni ang. Inthlanna atan hian vote thlakna khawl EVM hman a ni dawn a ni.

<><><>

AMC

Thlaleh April ni 21-a Aizawl Municipal Corporation inthlan lo awm tur atan Political Party hrang hrangte'n vote zawn an ngawrh chho hle a,

ZPM leader, Chief Minister Pu Lalduhoma chuan, MNF AMC-te khan Aizawl an lo vei lo hle a ti a, AMC hnuaia ULB Grant tur chu Kum 2024-25 khan cheng nuai 2,976 an nawrchhuak a. Hei hi AMC-ten an ngawih bopui a, March ni 18 khan an hrechhuak chauh a, a lapse loh nan cheng nuai 2,876.88 an haichhuak leh hman a, Nikum hmasaa mi an haichhuak a, tuna mite kutah a lut a, tunah an hmang thei dawn ta chauh a ni a ti. Pu Lalduhoma chuan, kum 2025-26 Grant nawrchhuah leh a ngai a, cheng nuai 3053 lapse tur a awm a, tun ni hnih lek la awm chung hian nawrchhuahkan tum leh mek a, ngaihsak loh avanga hetiang a liam ringawt tur chu a paw i an ti tih sawiin, an ui a, theihtawp an chhuah mek a ti a ni.

AMC Sports Complex, Bawngkawn chungchangah mi 16 hnena hna inpek chungchang bakah JCB nei reng chung a mimal JCB hawha Tuirial bawlhhlawh paihna siam a ni te leh SIPMIU-in a thlawna AMC hnenah tipper 50 leh pik up 4 Cheng nuai 24 chuanga an neih kha cheng nuai 5 awrhin an hralh duh leh mai te chu thil diklo tamtak awm niin a lang a ti a, Mizoram khawpui berah kalphung hlui kaihhruai sorkar AMC a thildiklo te siamthat a hun a ni a ti.

Chief Minister chuan tuna an sorkar leibat zat chu SASCI avangtein a lang tam lo thei lova, a lan tam chu an duh zawk tih a sawi bawk a ni.

MNF President Pu Zoramthanga chuan vawiin khan Mizo Hnam Run-a an party chhung inkhawmah AMC inthlan lo awm tur atana an party Manifesto a tlangzarh a, MNF Manifesto-ah hian Aizawl khawpui chuan kum 136 a tling a, Zofate Jerusalem a nih angin khawpui nuam, fai leh thianghlim, hmasawn leh zual ni tura theihtawpa thaa enkawl chu MNF party chuan tul a tiin a ngai pawimawh hle tih tarlangin AMC election 2026-ah hian MNF party in Pathian leh mipuite zara sorkarna a siam chhonzawm leh a nih chuan Aizawl khawpui enkawl tura hmalak an tum dan pawimawh zualte an tarlang a ni.

He hunah hian MNF Sr. Vice President Dr. R. Lalthangliana chuan thusawiin, Assembly House-a a thut leh hnuaiah Chief Minister Pu Lalduhoma'n January ni 17-a Prime Minister Narendra Modi hnena Aizawl khawpui chu a tawt tawh em avangin Thenzawl a sawn tura ngenna lehkha a thawn chu a document ngei pek ve a nih thu a sawi a,

Aizawl khawpui Thenzawla sawn tur atana DPR siamna tur cheng vbc 10 chuanga an dil pawh Aizawl mipuite beng a thlen tak tak chuan Khawpui (Capital) ni lovin Peace City din tumna niin Chief Minister chuan a sawi leh daih a ti a, MNF chuan Aizawl khawpui chu khawpui a nihna angin cheina tur tam tak a la awm avangin AMC inthlan lo awm turah MNF-in sorkarna a chang leh a nih chuan Aizawl khawpui chei tha turin hma an la dawn tih a sawi a, mipuite chu MNF vote turin a sawm a ni.

MPCC Sr. Vice President Pu Lalnunmawia Chuaungo chuan vawiina Congress Bhavan-a an party Political Session-ah thusawiin, ram rorelna fawng chelh leh turin Congress chu an inbuatsaih mek a ti a, hemi an inbuatsaihna kawnga pawimawh em em AMC inthlan a awm dawn a ti a, Mizoram chuan a hun taka AMC inthlan neih pui ngam lo ZPM kaihhruai sorkar an hrawn mek tih sawiin,

AMC term a tawp hnua direct-a AMC an thununna hnuaia a awm hun an nghak phawt a ti a, hei bakah hian sorkar tawh zawng zawngin an lo tih thin tho, mipui sum tling khawm hmanga Aizawl khawpui kawng siamthat nial nual avanga mipuite rilru suk nem an tum niin a lang a ti a. Hetihruah hian an hmalakna chuan kawngro a su vak dawn lo niin a lang a ti a, Aizawl khawpui leh AMC enkawl turin Congress candidate te chu an tha tawk a, vote turin mipuite a sawm a ni.

Akashvani News Aizawl zawhna chhangin, BJP Mizoram President Dr.K. Beichhua chuan AMC inthlan lo awm turah hian an party chuan khawtlang leh ram tana ngaihtuahna hmang thintu candidate fel tak tak mi 11 an neih te chu an chhuang hle a ti a, Party dang candidate te pawh tha tak tak ni mah se, vawiina Mizoram dinhmun enin eng party-in nge hmasawanna ruhrel tipuitling thei tih ngaihtuah chungin Central-a sorkarna chang mek BJP vote turin mipuite a sawm a, BJP kaihhruai sorkar thil tih tawh chinah tu mai pawhin Prime Minister Pu Modi-a hmalakna that zia an hmuh angin AMC-a BJP candidate te pawhin an thil tum chu Viksit Bharat leh Viksit Mizoram a ni tih sawiin, AMC-ah hian sorkarna an lak chuan Aizawl hmasawanna chu an thupui ber a nih tur thu a sawi a ni.

<><><>

BLOOD DONATION

Champhai District a AVBD Asst.Secretary Pu PC.Lalchuangkiman a vawi 100 na atan Champhai district Hospital Blood Bank ah a mamawh apiangin an hman atan thisen a pe.

Mizorama thisen pe tam ber record siam mektu, Tv.C.Lalremruata, Aizawl Electric Veng, vawi 98 thisen pe tawh chu lehpelin, Pu PC Lalchuangkima hian record thar a siam a ni.

Champhai District Association for Voluntary Blood Donation chuan vawiinah Inkhawm tawite siamin, Pu PC Lalchuangkima chawimawina leh lawmpuina thuziak cheimawi an hlan a ni.

<><><>

SERCHHIP JAIL HEALTH CAMP

Vawiin khan Serchhip District Legal Services Authority leh Serchhip District Hospital tangkawpin Chhiahtlang District Jail ah Health Camp an buatsaih.

He Health Camp ah hian Specialist Doctor panga ten tang mi 71 leh naute pakhat leh thawk tu mi 10 te tan Health Check up an nei a. Non Communicable Disease (NCD) leh TB screening neih nghal a ni a. A thlawnin damdawi an sem nghal bawk a ni.

<><><>

MSU

Mizo Students' Union (MSU) General Headquarters hruaitute chuan sawrkar hnathawk aikal la mi 14 an awm thu Education Minister Dr. Vanlalhlana hnenah vawiin khan an thlen a, hma la tur leh bawhzui turin Education Minister hi an ngen a ni.

Education Minister chuan MSU hruaitute chu chhangin hemi chungchang hi a bawhzui tur thu leh hmalak nghal a nih tur thu a lo hrilh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

KOLASIB POLICE

Kolasib Police te chuan District Drug Disposal Committee ruahman angin Kolasib Police Station tualah ruihhlo an man te vawiin khan an halral a. He hunah hian Kolasib SP, SDO(Sadar), Addl.SP, Dy.SP leh Asst. Commissioner of Excise bakah MJA Kolasib member thenkhat an tel a ni.

Vawiin a Ruihhlo halral hi Methamphetamine – kg 23, Heroin No.4 – gram 180 vel leh Ganja – kg 10 te a n a, Ruihhlo hal ral hi NCB chhut dan in Meth hi cheng vbc 18 nuai 74 leh sing 4 man hu a ni a, Ganja hi cheng nuai 50 man hu a ni bawk a, Heroin hi cheng nuai 36, man hu a ni bawk.

Methamphatamine hi nikum february thla khan Vairengte P/S atanga man niin Heroin leh Ganja hi Kolasib P/S atanga man a ni.

<><><>

LS

Lok Sabha chuan vawiin khan The insolvency and bankruptcy Code (Amendment) bill,2025 chu a pass.

He bill hi mimal leh company sumdawng te inkara thil kalsual thei leh ngaihndan inpersan thei siamthatna tur a ni a, Finance Minister Nirmala Sitharaman chuan the insolvency and bankruptcy Code 2016 hi ba thinna tur chauh ni lova, sumdawng tlachhia leh chhanchhuah ngai tanpuina a nih thu a sawi.

<><><>